

५६

विविधतीर्थकल्पे

३०. कपर्दियक्षकल्पः ।

सिरिसत्तुंजयसिहरे परिद्विअं पणमिऊण रिसहजिणं । तस्सेवयस्स वुच्छं कवड्डिजक्खस्स कप्पमहं ॥ १ ॥

अत्थि वालक्कजणवए पालित्ताणयं नाम नयरं । तत्थ कवड्डिनामधिज्जो गाममहत्तरो । सो अ मज्जमं-
समहुजीवघायअलिअवयणपरधणहरणपररमणीरमणाइपावट्ठाणपसत्तचित्तो ^१अणहीनामियाए अणुरूवचिट्ठिआए भज्जाए
५ सह विसए उवभुंजंतो गमेइ कालं । अन्नया तस्स मंचयद्वियस्स साहुजुअलं^२ घरे पत्तं । तेणावि दिट्ठिपण्णामं काउं
विन्नत्तं जोडियकरेणं-भयवं ! किमित्थागमणकारणं तुम्हाणं ? । अम्ह घरे दुद्ध-दहि-घय-तक्काइ य पउरमत्थि; जेण कज्जं तं
आइसह । साहुहिं भणिअं-न अम्हे भिक्खवट्ठमागया किंतु अम्ह गुरुणो सपरिवारा सितुज्जजत्ताए आगया । संपयं
पुण वासारत्तो पत्तो;^३ साहूणं विहरिउं न कप्पइ । अओ तुम्ह पासे उवस्सयं मग्गेउमागया, जत्थ^४ सूरिणो सपरिवारा
चिट्ठंति । मयहरेण विन्नत्तं-दिण्णो मए उवस्सओ । आगच्छंतु सूरिणो, चिट्ठंतु अहासुहं । केवलं अम्हाणं पावनिरयाणं
१० धम्मोवएसो न दायवो त्ति । साहूहिं भणिअं-एवं होउ त्ति । तओ आगया गुरुणो । ठिया वासाचउम्मासिं । कुणंति
संतयं सज्झायं; सोसंति छट्ठमाईहिं नियतणुं । कमेण अइक्कंते वासारत्ते पारणए मुक्कलविंति^५ मयहरं गुरुणो । सो
तेसिं सच्चपइणत्तणओ परितुट्ठो नियनयरसीमसंधिं जाव बोलाविउं पट्ठिओ । पत्ताए सीमसंधीए सूरिहिं जंपिअं-भो
मेहर ! तए अम्हाणं उवस्सयदाणाइणा बहुउवयारो कओ । अओ संपइ किंचि धम्मोवएसं देमो, तेण पच्चुवयारो
कओ हवइ । मेहरेण भणियं-नियमो न ताव मह निबहइ; किंचि मंतक्खरं उवइसह । तओ सूरिहिं अणुकंपाए पंच-
१५ परमिट्ठिनवकारमहामंतो सिक्खाविओ जलजलणथंभणाइपभावो अ तस्स उववणिओ । पुणो गुरुहिं भणिअं-पइदिअहं
सितुज्जदिसाए होऊण तुमए पणामो कायवो । मेहरेण तह त्ति पडिवज्जिऊण गुरुणो पणमिऊण नियघरे आगयं ।
सूरिणो अन्नत्थ विहरिआ । कमेण तं पंचपरमिट्ठिमंतं जविंतो नियमं च निब्राहिंतो कालं अइवाहेइ । अन्नया नियघ-
रिणीए कलहं काऊण गेहाओ नीसारिओ । आरुहिउं लगो सितुज्जगिरिसिहरं । जाव मज्जभरियं भायणं करे
धरित्ता वडरुक्खच्छायाए मज्जपाणं करिउकामो उवविट्ठो, ताव गिज्झमुहकुहरद्वियअहिगरलबिंदू मज्जभायणे^६ पडिओ
२० दिट्ठो । तं दट्ठण विरत्तमणो मज्जं निअमेइ । भवविरत्तो अ अणसणं काऊण तक्खणं आइजिणिंदचलणकमलं
नवकारं च संभरंतो सुहज्झाणेण मरणं संपत्तो^७ । तित्थमाहपेणं नवक्कारप्पभावेणं च कवड्डिजक्खो उप्पन्नो^८ ।
ओहिनाणेण पुबभवं संभरिअ आइजिणिंदं अच्चेइ । सा य तस्स गेहिणी तबइयरं सुणित्ता^९ तत्थ आगंतूण अप्पाणं
निंदंती अणसणं करित्ता जिणिंदं सुमरंती कालधम्ममुवगया । जाया तस्सेव करिवरत्तेण वाहणं । कवड्डिजक्खस्स
चउसु भुअदंडेसु कमेण पासंकुस-दविणवासणिआ-वीयपूराइ चिट्ठंति । पुणो सो ओहिणा आभोएऊण पुबभवगुरुणं
२५ पायमूले पत्तो । वंदित्ता जोडिअकरयलो विन्नवेइ-भयवं ! तुम्ह पसाएण एरिसा मए रिद्धी लद्धा^{१०} । संपयं मह किंचि
किच्चमाइसह । गुरुणा जंपियं-इत्थ तित्थे निच्चं तुमए ठापयवं; तिकालं जुगाइनाहो अंचिअवो;^{११} जत्तागयभविअज्जाणं
मणवंछिअफलं पूरेयवं; सयलसंघस्स विग्घा अवहरिअवा । तओ गुरुणं पाए वंदिअ तह त्ति पडिवज्जिअ गओ जक्खा-
हिवो विमलगिरिसिहरं । करेइ जहा गुरुवइइं ।

इअ अंबादेवीए कवड्डिजक्खस्स जक्खरायस्स । लिहिअमिणं कप्पजुगं जिणपहसूरिहिं वुड्ढवयणाओ ॥ १ ॥

३०

॥ इति कपर्दियक्षकल्पः ॥

॥ अं० ४२ ॥

१ P अणिही^१ । २ P °जुगलं । ३ A 'पत्तो' नास्ति । ४ P तत्थ । ५ C मुक्कलयाविंति । ६ A B मज्जपाणे ।
७ P पत्तो । ८ P समुप्पन्नो । ९ P सुणित्ता । १० P रिद्धी मए पाविया । ११ P अच्चियव्वो ।